

25 AUG 1998

Shahidan-Ekonomi

SHAHIDAN KECEWA ADA PENDUDUK TIDAK SERTAI USAHA PULIH EKONOMI

KANGAR, 25 Ogos (Bernama) -- Menteri Besar Perlis, Datuk Seri Shahidan Kassim kecewa dengan segelintir penduduk yang bersikap "tunggu dan lihat" ketika kerajaan sedang bertungkus lumus memulih ekonomi.

Katanya, mereka sepatutnya menyertai majoriti rakyat yang bersama kerajaan dalam usaha pemulihan itu bagi memastikan ekonomi negara kembali mantap.

Bercakap kepada pemberita semasa meninjau mangsa-mangsa ribut di kawasan Tambun Tulang dekat sini hari ini, Shahidan berkata, ada juga di kalangan penduduk yang bertindak sebagai perintang usaha itu dengan tidak memberi sokongan kepada langkah yang dicadangkan oleh kerajaan.

Beliau berkata, tindakan tegas perlu diambil terhadap mana-mana pihak sama ada golongan atasan atau bawahan yang terbukti menjadi penghalang kepada perjuangan memulihkan ekonomi negara.

Shahidan yang juga anggota Majlis Tertinggi UMNO berkata antara langkah yang boleh diambil oleh anggota parti itu dalam usaha pemulihan ekonomi ialah memberi sokongan padu kepada Datuk Seri Dr Mahathir Mohamad sebagai presiden parti.

Sementara itu, sebanyak tujuh rumah dalam kawasan Tambun Tulang dan Pauh rosak terutama pada bahagian bumbung dalam kejadian ribut pukul 6.30 petang semalam.

Bagaimanapun tiada mangsa yang cedera dalam kejadian yang disertai hujan lebat itu.

Shahidan berkata, kerajaan negeri akan memberi bantuan secepat mungkin kepada mangsa-mangsa terbabat.

-- BERNAMA

AD NMO